

01/08/2003

Hari Pahlawan disambut seluruh negara

Kadir Dikoh; Fazallah Pit; Mona Ahmad; Mohd Hamizar Hamid; Mohd Amin  
KUALA LUMPUR: Perdana Menteri, Datuk Seri Dr Mahathir Mohamad, semalam meletak kalungan bunga di Tugu Peringatan Negara di sini sempena sambutan Hari Pahlawan 2002 peringkat kebangsaan.

Hari Pahlawan 2003 turut disambut di peringkat negeri bagi mengenang dan menghargai jasa pahlawan yang terkorban serta cedera ketika mempertahankan kedaulatan agama, bangsa dan negara.

Perdana Menteri yang tiba pada jam 8.30 pagi, memeriksa barisan kehormat.

Sambutan dimulakan dengan tiupan bugle 'Last Post' dan penurunan bendera Jalur Gemilang, diikuti bacaan sajak 'Pahlawan' ciptaan Mejar (B) Mohamad Awang, diiringi muzik pancaragam Polis Diraja Malaysia (PDRM).

Deklamasi sajak itu untuk mengenang jasa pahlawan negara yang terkorban di medan perang sejak Perang Dunia Kedua, zaman darurat dan yang terkorban di luar negara semasa menjalankan misi keamanan di bawah mandat Pertubuhan Bangsa-Bangsa Bersatu (PBB).

Upacara peletakan kalungan bunga menyusul dimulakan oleh Dr Mahathir, diikuti Panglima Angkatan Tentera Malaysia, Jeneral Tan Sri Mohd Zahidi Zainuddin dan Timbalan Ketua Polis Negara, Datuk Seri Mohd Bakri Omar bagi pihak Ketua Polis Negara. Acara ringkas itu diakhiri dengan tiupan 'rouse'.

Hadir sama Menteri Pertahanan Datuk Seri Najib Razak, menteri-menteri kabinet dan jemputan khas dari kedutaan asing di ibu negara selain pegawai kanan polis dan tentera.

Turut memberi penghormatan pada majlis itu ialah bekas panglima-panglima tentera dan anggota tentera yang pernah berjuang semasa Pendudukan Jepun pada awal tahun 1940-an.

Di SHAH ALAM, Sultan Selangor, Sultan Sharafuddin Idris Shah, berkenan menghadiri upacara sambutan Hari Pahlawan peringkat negeri yang diadakan di pekarangan Tugu Negeri Selangor, semalam.

Baginda turut berkenan meletakkan kalungan bunga sebagai tanda memperingati pahlawan yang terkorban ketika berjuang untuk mempertahankan tanah air.

Antara yang meletakkan kalungan bunga termasuk Menteri Besar, Datuk Seri Dr Mohamad Khir Toyo dan Ketua Polis Selangor, Datuk Mohd Nor Hamat.

Di IPOH, seramai 450 anggota pasukan beruniform mengadakan perbarisan sempena sambutan Hari Pahlawan peringkat negeri Perak yang dirasmikan Sultan Perak, Sultan Azlan Shah di Dataran Bangunan Perak Darul Ridzuan.

Majlis itu turut disertai Menteri Besar, Datuk Seri Tajol Rosli Ghazali dan Setiausaha Kerajaan Negeri, Datuk Isahak Yeop Mohamad Shar serta beberapa exco kerajaan negeri yang lain.

Sejumlah 15 kontinjen yang diwakili 30 anggota setiap satu termasuk Angkatan Tentera Malaysia (ATM), PDRM, Pasukan Bomba dan Penyelamat serta Jabatan Pertahanan Awam (JPA3) mengambil bahagian.

Di KOTA BHARU, sambutan Hari Pahlawan dan pelancaran Kempen Rayuan peringkat negeri diadakan di Padang Merdeka, Jalan Tengku Putera Semerak di sini, dimulakan dengan acara tiupan bugle 'Last Post' kira-kira jam 8.30 pagi.

Menteri Besar, Datuk Nik Abdul Aziz Nik Mat mengetuai bacaan doa sempena sambutan itu selepas upacara deklamasi sajak Hari Pahlawan.

Hadir sama, Timbalan Menteri Besar, Datuk Abd Halim Abd Rahman; Panglima 8 Briged, Brig Jen Zulkifeli Mat Zin dan Ketua Polis Kelantan, Senior

Asisten Komisioner (1) Datuk Mohd Najib Abdul Aziz.

Di SEREMBAN, Menteri Besar, Tan Sri Mohd Isa Abdul Samad, berkata sasaran kutipan Rayuan Hari Pahlawan (RHP) sebanyak RM100,000 mampu dicapai sekiranya kempen yang diadakan secara meluas mendapat kerjasama semua pihak.

"Keamanan negara tidak mungkin akan dapat dinikmati sehingga ke hari ini tanpa kesediaan dan pengorbanan pasukan keselamatan daripada angkatan tentera yang berjuang mempertahankan kedaulatan negara.

"Melalui sumbangan sekurang-kurangnya RM1, dapat melahirkan tanda syukur di atas jasa dan pengorbanan mereka dalam memastikan keamanan negara terpelihara," katanya ketika melancarkan Kempen RHP 2003 Peringkat Negeri di sini.

Di KOTA KINABALU, Yang di-Pertua Negeri Tun Ahmadshah Abdullah, mendahului orang kenamaan negeri dalam upacara meletakkan karangan bunga di Ujana Tropika Bandaraya, Jalan Penampang, dekat sini.

Kira-kira 200 orang daripada pasukan beruniform serta pemimpin persatuan bekas tentera dan polis menghadiri upacara itu yang bermula pukul 7 pagi.

Turut hadir Timbalan Ketua Menteri Datuk Lajim Ukin, Pesuruhjaya Polis Sabah Datuk Pahlawan Ramli Yusuff serta Panglima Briged Kelima Infantri Brig Jen Datuk Muhamad Yasin Yahya.